

明

會

要

明會要卷三

永新龍文彬纂

帝系三

皇太子

洪武元年正月立世子標爲皇太子

本紀

太子文奎建文元年立爲皇太子燕師入七歲矣莫知所終

諸王傳

永樂二年四月甲戌立子高熾爲皇太子帝初起兵高煦常從戰有功帝以爲類己高煦亦以此自負謀奪嫡及議建儲邱福等言高煦有功宜立獨金忠力爭以爲不可帝

召解縉問之縉稱皇長子仁孝天下歸心帝不應縉又頓首曰好聖孫謂皇孫瞻基也復問黃淮尹昌隆對與縉同帝意乃決

二十二年仁宗卽位十月壬子立子瞻基爲皇太子明年五月帝不豫遣使召皇太子於南京太子方謁孝陵卽日就道時南京頗傳凶問又傳漢王高煦謀伏兵於道邀太子羣臣請整兵衛或請從間道行太子不可曰君父在上誰敢干之驛道馳還入宮發喪越十日卽位

宣德三年二月戊午立皇長子祁鎮爲皇太子時胡皇后未有子而孫貴妃有寵陰取宮人子爲己子帝以長子生

大喜甫八日羣臣上表請立爲太子皇后亦屢表請早定
國本貴妃佯驚曰后病痊自有子吾子敢先后子耶帝不
允貴妃子遂立

已上
三編

正統十四年八月己巳皇太后詔立皇子見深爲皇太子
景泰三年五月甲子廢皇太子見深爲沂王立皇子見濟
爲皇太子四年十一月辛未皇太子見濟薨諡懷獻
天順元年三月己巳復立長子見深爲皇太子

成化七年十一月甲寅立皇子祐極爲皇太子八年正月

薨諡悼恭

已上
本紀

十一年十一月癸丑立皇子祐橈爲皇太子時皇子潛養

西內已六年是年五月遣使至安樂堂迎皇子越數日帝
召閣臣問曰皇子旣出將何以處之商輅曰陛下踐祚十
年儲副未立天下引領望久矣當卽立爲皇太子安中外
心帝遂定名頒詔中外

三編

宏治五年三月戊寅立皇子厚照爲皇太子

嘉靖十八年正月庚子朔立皇子載壑爲皇太子乙卯幸
承天太子監國

年四歲

二十八年三月丁亥皇太子薨謚莊

敬

隆慶二年三月辛酉立皇子翊鈞爲皇太子

已上本紀

萬曆二十九年十月辛卯立皇長子常洛爲皇太子時太

子年二十羣臣屢請冊立冠婚並行沈一貫草敕請下禮
官具儀而廷議有欲先冠婚後冊立者一貫不可曰不正
名而苟成事是降儲君爲諸王也帝意亦悟命卽日舉行
旣而復令改期一貫封還論旨力爭乃立爲皇太子

三編

太子慈烺莊烈帝第一子崇禎二年二月生九月立爲皇
太子京師陷賊獲太子僞封宋王及賊敗西走太子不知
所終由崧時有自北來稱太子者驗之以爲駙馬都尉王
昺孫王之明者僞爲之繫獄中南京士民譁然不平袁繼
咸劉良佐黃得功輩皆上疏爭左良玉起兵亦以救太子
爲名一時眞僞莫能知也

諸王傳

雜錄

洪武元年正月辛巳中書省都督府請倣元制以太子爲中書令帝以元制不足法令詹同考厯代東宮官制設少師少傅少保詹事率府使諭德贊善賓客等官以李善長兼領之諭之曰朕於東宮不別設府僚而以卿等兼領者蓋軍旅未息朕若有事於外必太子監國若設府僚卿等在內事當啟聞太子或聽斷不明與卿等意見不合卿等必謂府僚導之嫌隙易生朕所以特置賓客諭德者欲輔太子德性且選名儒爲之職此故也昔周公教成王克詰戎兵召公教康王張皇六師此居安慮危不忘武備蓋繼

世之君生長富貴睚於安逸不諳軍旅一有緩急罔知所

措二公之言其並識之

洪武聖政記

十一月辛丑建大本堂取古今圖籍充其中徵四方名儒
教太子諸王選才俊之士充伴讀上時臨幸評論古今嘗
御文樓太子侍問近與諸臣讀何史對曰漢七國事問曲
直安在對曰曲在七國上曰此講官一偏之說景帝爲太
子時以博局殺吳世子及爲帝又輕聽晁錯黜削諸侯七
國之變實由於此若爲諸子則宜言藩王當上尊天子毋
撓天下公法如此則爲太子者知敦睦九族隆親親之恩
爲諸子者知夾輔王室盡君臣之義矣

三編

十年六月丙寅命羣臣大小政事先啟皇太子裁決上聞
諭曰自古創業之君厯涉勤勞達人情周物理故處事咸
當守成之君生長富貴若非平昔練達鮮不謬者故吾特
命爾日臨羣臣聽斷諸司啟事以練習國政

興宗傳

永樂二年三月文華寶鑑成上御奉天門召皇太子授之
又顧大學士解縉等曰朕皇考訓戒太子嘗集經傳格言
爲書名儲君昭鑑錄今朕此書稍充廣之昔秦始皇教太
子以法律晉元帝授太子以非聖之書帝王之道廢而不
講所以速亡朕此書皆大經大法卿等兼輔東宮從容閒
暇以此陳說庶幾成其德業他日不失爲守成令主

昭代
典則

成祖數北征命太子監國裁決庶政高煦高燧與其黨日伺隙譏搆或問太子亦知有讒人乎曰不知也吾知盡子職而已十年北征還以太子遣使後期且書奏失辭悉徵宮僚黃淮等下獄十五年高煦以罪徙樂安明年黃儼等復讒太子擅赦罪人宮僚多坐死者侍郎胡濙奉命察之密疏誠敬孝謹七事以聞其後黃儼等謀立高燧事覺伏誅高燧以太子力解得免自是太子始安

本紀

永樂十二年北征還悉徵東宮官屬下獄以金忠勳舊不問而密令審察太子事退言無有帝怒忠免冠頓首流涕願連坐以保之以故太子得無廢

金忠傳

十八年十二月皇太子奏前過山東境內遇民饑卽令布政使放粟賑之帝曰是也昔范仲淹之子猶能舉麥舟濟其父之故舊况百姓吾之赤子乎

大訓記

景泰三年四月賜閣臣陳循高穀白金各百兩江淵王一甯蕭鎡商輅半之上自卽位後久欲易皇太子以己子見濟代之而難於發言遲回久之太監王誠舒良爲上謀先賜閣臣以緘其口然猶未發也會廣西土目黃竑有罪下獄遣其黨千戶袁洪至京師行賂有教之上書迎合帝意者乃倡易儲議以上上曰萬里之外乃有此忠臣趣下廷臣議於是更封太子爲沂王立見濟爲太子

三編

四年懷獻太子旣薨中外望復沂王於東宮御史鍾同與禮部郎中章綸早朝語及沂王皆泣下因約疏請復儲同上疏抗論時政遂及復儲事其略曰父有天下固當傳之於子乃者太子薨逝足知天命有在臣竊以爲上皇之子卽陛下之子沂王天資厚重足令宗社有託伏望擴天地之量敦友于之仁蠲吉具儀建復儲位實萬世無疆之休

鍾同傳

五年七月南京大理寺少卿廖莊上疏略曰太子者天下之本上皇之子陛下之猶子也宜令親儒臣習書策以待皇嗣之生使天下臣民曉然知陛下有公天下之心豈不

美與蓋天下者太祖太宗之天下仁宗宣宗繼體守成者此天下也上皇北征亦爲此天下也今陛下撫而有之宜念祖宗創業之艱難思所以繫屬天下之心卽弭災召祥之道莫過於此

廖莊傳

天順二年四月太子始講學於文華殿

卽所謂左春坊也

八年正月乙卯帝不豫臥文華殿有間太子於帝者帝密召李賢告之賢頓首伏地曰此國本也願陛下三思帝曰然則必傳位太子乎賢又頓首曰宗社幸甚帝起召太子至賢扶太子令謝太子抱帝足泣帝亦泣讒竟不行

已上三編

憲宗一日視內藏見累朝金窖俱盡謂太監梁芳及韋興

曰靡費內藏實由汝二人興不敢對芳曰建顯靈宮及諸
祠廟爲陛下祈萬年福耳帝不懌曰吾不汝瑕後之人將
與汝計矣芳大懼遂說貴妃勸帝廢太子而立興王會泰
山屢震占者言應在東朝帝懼乃止

梁芳傳

宏治七年正月馬文升以太子年及四齡當早諭教請擇
醇謹老成知書史如衛聖楊夫人者保抱扶持凡言語動
止悉導之以正若內庭曲宴鐘鼓司承應元宵鼇山端午
競渡諸戲皆勿令見佛老之教尤宜屏絕恐炫惑心志帝
深納之

馬文升傳

隆慶五年二月甲午廷臣及朝覲官謁太子於文華左門

本紀

萬厯十年八月丙申皇長子常洛生恭妃王氏出也十四年鄭貴妃生子常洵遂進封而王妃生皇長子已五歲不益封中外藉藉疑帝將立愛戶科給事中姜應麟抗疏言欲別嫌明微莫若冊立元嗣爲東宮以定天下之本帝怒貶應麟廣昌典史已吏部員外郎沈璟刑部主事孫如游繼言之並得罪兩京申救者疏數十上皆不省自後言者

盜起

姜應麟傳

二十二年皇長子常洛已十四歲帝手諭閣臣令議出閣講學禮儀免御門慶賀用輔臣侍班侍臣六人侍講讀俱

如東宮儀大學士王錫爵言皇長子出閣輔臣每日一員侍班此雖隆慶年新例但今天顏尙不得時覲而於皇長子進見頻數似涉嫌疑請自初講二日以後間十日輪侍從之

三編

三十一年獲妖書託鄭福成爲問答鄭福成者謂鄭之福王當成也言帝必易東宮詞極詭妄帝大怒敕錦衣衛揆捕甚急久之乃得皦生光者坐極刑四十三年梃擊事起主事王之案疏言張差獄情詞連貴妃宮內侍龐保劉成等朝議洵洵貴妃聞之對帝泣帝曰須自求太子貴妃向太子號訴帝召見羣臣令太子降諭禁株連於是張差獄

乃定

后妃傳

皇太孫

洪武二十五年夏四月皇太子標卒帝御東角門召對羣臣慟哭曰太子不幸至此古云國有長君社稷之福朕意欲立燕王何如學士劉三吾進曰皇孫世嫡承統禮也卽立燕王置秦晉二王於何地帝意遂決九月立孫允炆爲皇太孫

三編

二十六年七月戊申選秀才張宗濬等隨詹事府官分直文華殿侍皇太孫

初太祖命太子省決奏章太子仁厚於刑獄多所減省至

是以命太孫亦復佐以寬大嘗請於太祖遍考禮經參之
歷朝刑法改定洪武律畸重畸輕者七十三條紀上

帝命太孫裁決庶務邏者獲盜七太孫目之言於帝曰六
人者盜其一非是訊之果然帝問何以知之對曰周禮聽
獄色聽爲先此人眸子瞭然顧視端詳必非盜也帝曰治
獄貴通經信然編三

永樂九年十一月立長孫瞻基爲皇太孫

皇太孫始冠自是巡幸征討皆從嘗命學士胡廣等卽軍
中爲太孫講論經史每語仁宗曰此他日太平天子已上本紀

追諡太子

哀沖太子載基

世宗第一子母貴妃閻氏

嘉靖十二年八月生十月薨

追冊諡

憲懷太子翊鉞

穆宗長子母莊皇后李氏

嘉靖三十四年生三十八年

薨初贈裕世子隆慶元年追冊諡

已上集山別集

懷沖太子慈然

嘉宗第一子

悼懷太子慈煇

嘉宗第二子

懷獻太子

慈貝

嘉宗第三子

皆殤

諸王傳

明會要卷三終

明會要卷四

永新龍文彬

帝系四

諸王

明制皇子封親王授金冊金寶歲祿萬石府置官屬護衛甲士少者三千人多者至萬九千人隸籍兵部冕服車旗邸第下天子一等公侯大臣伏而拜謁無敢鈞禮親王嫡長子年及十歲則授金冊金寶立爲王世子長孫立爲世孫冠服視一品諸子年十歲則授塗金銀冊銀寶封爲郡王嫡長子爲郡王世子嫡長孫則授長孫冠服視二品諸

子授鎮國將軍孫輔國將軍曾孫奉國將軍四世孫鎮國中尉五世孫輔國中尉六世以下皆奉國中尉其生也請名其長也請婚祿之終身喪葬予費親親之誼篤矣諸王傳序洪武元年追封叔父爲壽春王兄爲南昌王盱眙王臨淮王從兄弟爲霍邱王下蔡王安豐王蒙城王兄子爲山陽王昭信王從子爲寶應王六安王來安王都梁王英山王所謂宗室十五王也通紀

三年封南昌王嫡孫守謙爲靖江王

太祖二十三王秦愍王桀事具雜錄晉恭王櫓周定王櫛

惠帝卽位以罪廢爲庶人成祖復封事具雜錄楚昭王楨齊王樽建文初以罪廢

為庶人成祖復封

潭王梓

洪武二十三年以子坐胡惟庸黨自焚死

趙王杞

魯荒王檀

蜀獻王椿

雜事具錄

湘獻王柏

代簡王桂

建文初以罪廢為庶人成祖復封事具雜錄

肅莊王模

遼簡王植

慶

靖王櫛

甯獻王權

雜事具錄

岷莊王楨

建文初以罪廢為庶人成祖復

封

谷王穗

燕師入京開門迎降成祖時以罪廢為庶人

韓憲王松

濬

簡王模

安惠王楹

唐定王桎

郢靖王棟

伊厲

王櫛

興宗四王虞懷王雄英

洪武十五年薨年八歲追加封諡

吳王允熲

建文

元年封成祖降為庶人澤王旋廢為庶人

衡王允燧

建文元年封成祖降為懷恩王旋廢為庶人

人

徐王允燾

建文元年封成祖降為敷惠王永樂二年改甯王四年邸中火暴薨諡哀簡

成祖二王漢王高煦

宣德初謀反伏法事具雜錄

趙簡王高燧

事具雜錄

仁宗九王鄭靖王瞻埈

越靖王瞻墉

蘄獻王瞻垠

初封

靜樂王永樂十九年薨諡莊獻仁宗卽位追加封諡

襄憲王瞻埈

事具雜錄

荆憲

王瞻垠

淮靖王瞻堧

滕懷王瞻埈

梁莊王瞻垠

衛恭王瞻埈

英宗七王德莊王見潋

許悼王見瀉

秀懷王見澍

崇簡王見澤

吉簡王見浚

忻穆王見治

徽莊王

見沛

事具雜錄

憲宗十王興獻王祐杭

事具追諡皇帝

岐惠王祐楹

益端王

祐檣

衡恭王祐樞

雍靖王祐檣

壽定王祐椿

汝安王祐曄 涇簡王祐楫 榮莊王祐樞 申懿王

祐楷

孝宗一王蔚悼王厚煒早殤追加封諡

世宗五王景恭王載圳 頴殤王載壘 戚懷王載璽

薊哀王載墻 均思王載坻已上四王俱早殤追加封諡

穆宗二王靖悼王翊鈴早殤贈藍田王隆慶元年追加封諡 潞簡王翊鏐

神宗七王福恭王常洵事具雜錄 沅懷王常治早殤 瑞王常

浩崇禎十七年張獻忠陷重慶被執遇害 惠王常潤 桂端王常瀛

邠王常漵 永思王常溥早殤

光宗五王簡懷王由棖 齊思王由楫 懷惠王由模

湘懷王由栩

惠昭王由檣

已上五王俱早殤追加封諡

莊烈帝五王懷隱王慈烜

殤

定王慈烜

永王慈炤

崇禎

十七年賊陷京師二王俱不知所終

悼靈王慈煥

殤

悼懷王

殤

雜錄

凡王世子必以嫡長如或以庶奪嫡輕則降爲庶人重則流竄遠方若王年三十正妃未有嫡子其庶止爲郡王待王與正妃年五十無嫡子始立庶長子爲王世子

王圻續通考

洪武三年帝懲宋元孤立失古封建意於是擇名城大都豫王諸子待其壯而遣就藩服外衛邊陲內資夾輔

洪武六年三月頒昭鑑錄戒諸王先是命陶凱張籌等采

撫漢唐以來藩王善惡可爲勸戒者會凱出參行省編輯
未成於是召文原吉王僕等續修之書成二卷賜名昭鑑
錄頒賜諸王

已上三編

九年二月丙戌定諸王公主歲供之數丙寅定親王宮室

之飾

昭代典則

十一月平遙訓導葉伯巨上疏言三事其一分封太侈略
曰先王之制大都不過三國之一上下等差各有定分所
以強幹弱枝遏亂原而崇治本耳今裂土分封蓋懲宋元
孤立宗室不競之弊而秦晉燕齊梁楚吳蜀諸國無不連
邑數十城郭宮室亞於天子之都優之以甲兵衛士之盛

臣恐數世之後尾大不掉然後削其地而奪之權則必生
觖望甚者緣間而起防之無及矣昔賈誼勸漢文帝盡分
諸國地空置之以待諸王子孫向使文帝早從誼言則必
無七國之禍願及諸王未之國之先節其都邑之制減其
衛兵限其疆理以待封諸王之子孫此制一定然後諸王
有賢且才者入爲輔相其餘世爲藩屏與國同休割一時
之恩制萬世之利消天變而安社稷莫先於此

葉伯巨傳

八年詔郡王諸子年十五人賜田十六頃爲永業除其租

王圻續通考

蜀獻王椿性孝友慈祥博綜典籍容止都雅太祖常呼爲

蜀秀才在鳳陽時闕西堂延李叔荆蘇伯衡商推文史既至蜀聘方孝孺爲世子傅表其居曰正學以風蜀人時諸王皆備邊練士卒椿獨以禮教守西陲蜀人安業日益殷富川中二百年不被兵甲椿力也自椿以下四世七王幾百五十年皆檢飭守禮法好學能文孝宗稱蜀多賢王舉獻王家範爲諸宗法

本傳

周王橚初封吳王洪武七年有司請置護衛於杭州帝曰錢塘財賦地不可十一年改封周王十四年就藩開封以國土夷曠庶草蕃廡考覈其可佐饑饉者四百餘種繪圖疏之名救荒本草

本傳

十一年秦王檄就藩西安賜璽書曰關內之民自元氏失政不勝其敝今吾定天下又有轉輸之勞民未休息爾之國若宮室已完其不急之務悉已之二十八年薨賜諡冊曰哀痛者父子之情追諡者天下之公朕封建諸子以爾年長首封於秦期永綬祿位以藩屏帝室夫何不良於德竟殞厥身其諡曰愍

本傳

太祖念邊防甚且欲諸子習兵事諸王封並塞居者預軍務而晉燕二王尤被重寄數命將兵出塞及築城屯出大將如宋國公馮勝潁國公傅友德皆受節制又詔二王軍

中事大者方以聞

晉王傳

洪武二十一年給事中卓敬以諸王服乘有擬太子者乘間言京師天下視效陛下於諸王不早辨等威而使服飾與太子埒嫡庶相亂尊卑無序何以服天下

卓敬傳

二十六年賜諸王永鑑錄

二十八年更定宗人封爵冊寶之制親王金冊金寶妃授金冊郡王授塗金銀冊銀印

晉王第三子慶成王生一百子俱長成長子襲爵餘九十人并封鎮國將軍此古今異事也

已上王圻續通考

建文初卓敬密疏言燕王智慮絕倫雄才大略酷類高帝北平形勝地士馬精強金元所由興今宜徙封南昌萬一

有變亦易控制

卓敬傳

惠帝爲太孫時常坐東角門謂黃子澄曰諸王尊屬擁重兵多不法奈何對曰諸王護衛兵纔足自守儻有變臨以六師其誰能支漢七國非不强卒底滅亡大小强弱勢不同而順逆之理異也比卽位命與齊泰同參國政謂曰先生憶東角門之言乎子澄頓首曰不敢忘退而與泰謀欲先圖燕子澄曰不然周齊湘代岷諸王在先帝時多不法削之有名今欲問罪宜先周周王燕之母弟削周是剪燕手足也謀定明日入白帝會有言周王櫛不法者遂命李景隆帥兵襲執之詞連湘代諸府於是廢櫛及岷王榘爲

庶人幽代王桂於大同囚齊王搏於京師湘王柏自焚死

黃子澄傳

甯獻王權洪武二十六年就藩大甯大甯在喜峯口外東連遼左西接宣府爲巨鎮所屬朵顏三衛騎兵皆驍勇善戰燕王初起兵與諸將議曰曩余巡塞上見大甯諸軍慄悍吾得大甯斷遼東取邊騎助戰大事濟矣建文元年朝議恐權與燕合使人召權權不至坐削護衛燕王聞之喜遂單騎入大甯詭言窮蹙求救執權手大慟求代草表謝罪陰令吏士結三衛部長及諸戍卒乃辭去權祖之郊外伏兵起擁權行王府妃妾世子皆隨入松亭關歸北平大

甯城爲空權入燕軍燕王許以事成中分天下比卽位留
之京師乞改南土請蘇州錢塘皆不許封之南昌已而有
告權巫蠱誹謗者密探無驗得已權自是日韜晦搆精廬
一區讀書鼓琴其間終成祖世得無患

甯王傳

永樂元年十一月賜代王桂璽書曰聞弟縱戮取財國人
甚苦告者數矣且王獨不記建文時耶尋命有司自今王
府不得擅役軍民斂財物聽者治之

代王傳

九年使者至西安秦王尙炳稱疾不出迎見使者又傲慢
帝逮治王府官吏賜尙炳書曰齊王拜胙遂以國霸晉王
愴玉見譏無後王勉之尙炳懼來朝謝罪

秦王傳

宣德元年漢王高煦反帝召楊榮等定計榮首請帝親征
曰彼謂陛下新立必不自行今出不意以天威臨之事無
不濟

楊榮傳

帝難之夏原吉曰獨不見李景隆已事耶臣昨

見所遣將命下卽色變臨事可知矣且兵貴神速卷甲趨
之所謂先人有奪人之心也榮策善帝意遂決

夏原吉傳

車駕

發京師過楊村馬上顧從臣曰度高煦計安出或對曰必
先取濟南爲巢窟帝曰不然濟南雖近未易攻聞大軍至
亦不暇攻護衛軍家樂安必內顧不肯徑趨南京高煦外
誇詐實內怯臨事狐疑不能斷今敢反者輕朕年少新立
衆心未附不能親征耳今聞朕行已膽落敢出戰乎至卽

擒矣

高煦傳

帝擒高煦歸至單家橋尙書陳山迎駕言曰趙

王與高煦共謀逆久矣宜移兵彰德擒趙王否則趙王反側不自安異日復勞聖慮帝未決時惟楊士奇以爲不可

山復邀蹇義夏原吉共請帝曰先帝友愛二叔甚漢王自

絕於天朕不敢赦趙王反形未著朕不忍負先帝也

高燧傳

景泰時岷王徽燦奏蒙封臣子音烝爲嫡長子臣弟徽燦

爲江川王凡遇節令及家庭行禮班次不定命禮部議以

宗子法言之則以嫡長爲重以家人禮言之則以尊卑爲

先凡遇公禮則當依宗子法重在世子家庭私禮則當依

家人禮尊歸叔伯

天順中命諸宗室凡無子者方許請繼室生子至八歲者方許請名女至十五歲者方許請封

七年楚府岳陽恭僖王薨無嗣其弟鎮國將軍埤嫡長子輔國將軍均鎧請嗣封以奉恭僖之祀禮部言稽考近制惟親王無嗣有以郡王進封者郡王無嗣有以鎮國將軍進封者無輔國將軍封郡王例事遂止

已上春明夢餘錄

英宗北狩諸王中瞻墻長且賢眾望頗屬太后命取襄國金符不果召瞻墻上書請立皇長子令邸王監國募勇智士迎車駕書至景帝立數日矣英宗還京師居南內又上書景帝宜旦夕省問率羣臣朝朔望無忘恭順英宗復辟

石亨等誣于謙王文有迎立外藩語帝頗疑瞻墀久之於
宮中得瞻墀所上二書而襄國金符固在太后閣中乃賜
書召瞻墀比二書於金勝比至宴便殿命百官朝王於館
尋請還帝親送至午門外握手泣別瞻墀逡巡再拜帝曰
叔父欲何言頓首曰萬方望治如饑渴願省刑薄斂

襄王傳

初土木之難韓憲王子襄陵王冲炆赴京師勤王會解嚴
下書慰勞及成化六年寇入河套冲炆復請率子壻擊賊
憲宗止之冲炆與兄冲斌並急王事以藩禁嚴不用自是

宗臣無預兵事者

韓王傳

成化十七年徽王見沛就藩鈞州承奉司自置吏左布政

使徐恪革之見沛以聞憲宗書諭王置吏非制也恪無罪

徽王傳

宏治中唐王彌錦疏言朝廷待親藩生爵沒諡親親至矣
間有惡未敗聞歿獲美諡是使善者怠惡者肆也自今宜
勘實用寓彰瘡禮臣請降敕獎諭勉勵諸王詔可

唐王傳

初洪武二十五年議准王妃以下有所出者稱夫人宏治
四年定親王庶子受封其母始稱夫人

王圻續通考

十二年雍王祐樞之藩衡州地卑溼宮殿朽敗不可居邸
中數有異乞移山東東平州廷臣以擇地別建勞民傷財
四川敘州有申王故府宜徙居之詔可

雍王傳

秦王誠泳性孝友恭謹嘗銘冠服以自警秦以多賜地軍民佃以爲業供租稅歲歉輒蠲之長安有魯齊書院久廢故址半爲民居誠泳別易地建正學書院又旁建小學擇軍校子弟秀慧者延儒生教之親臨課試王府護衛得入學自誠泳始

秦王傳

正德初詔王府莊田畝徵銀三分歲爲常德王見潯奏初年兗州莊田歲畝二十升獨清河一縣成化中用少卿宋旻議歲畝五升若如新詔臣將無以自給戶部執山東水旱相仍百姓凋敝宜如詔帝曰王何患貧其勿許

德王傳

十二年襄陵王徵鈴請樂戶祀安王明年樂平王徵鉅援

徵鈴例以請禮部言親王有樂戶郡王別城居者有事假鼓吹於有司其附近王國者假樂戶於長史司因並革安

王供祀樂戶

安王傳

十三年秦王請關中間田爲牧地帝排羣議許之命閣臣草制梁儲度不可爭乃上制草曰太祖高皇帝著令茲土不畀藩封非吝也念其土廣饒藩封得之多畜士馬富而且驕奸人誘爲不軌不利宗社王今得地宜益謹毋收聚奸人毋多畜士馬毋聽狂人謀不軌震及邊方危我社稷是時雖欲保親親不可得已帝駭曰若是其可虞事遂寢

梁儲傳

嘉靖初棗陽王祐槐請除宗人祿使以四民業自爲生賢者用射策應科第寢不行

襄王傳

嘉靖七年輔國將軍當潰奏辭輔國將軍及子奉國將軍祿佐助運河賜敕褒諭又上書言各藩郡縣主縣君先儀賓沒者故事儀賓得支半祿今四方災傷邊陲多事民窮財盡而各儀賓暴橫侈肆多不法請勿論品級減其月給明年又請以父子應得祿米佐振因勸帝法祖宗重國本裁不急之費息土木之工詞甚愷切帝特敕褒之不聽辭

祿魯王傳

東甌王健楸無子上書言宗室所以蕃由詐以媵子爲嫡

糜費縣官今臣無嫡嗣請以所受府第屯廠盡歸魯府待
給新封省民財萬一乞著爲例報可上同

九年禮部議覆豐林王疏議處宗室事上自爲書賜諸王
欲將朝廷皇子皆封郡王親王次子皆封鎮國將軍書成
未發以示少傅張璉璉言諸王封爵原有定制恐一旦降
封有失親睦之道以臣愚計莫若量減祿而不降封郡王
以下凡全支俸米者照依京官事例米鈔或四六或中半
折支其有米鈔兼支者亦量爲遞減以示撙節上遂不果
行至嘉靖末禮部議上宗藩事例於是秦晉周楚蜀趙慶
襄淮德崇歲祿萬石辭一千石魯益衡歲祿萬石辭二千

石榮王萬三百石與唐王六千五百石而郡王以下至中

尉皆有所減削矣

明臣奏議

戶部議覈王府所請山場湖陂斷自宣德以後者皆還官
詔允行於是山東巡撫都御史邵錫奏德府莊田俱在革

中與德王祐榕相許奏錫持之益堅

德王傳

秦王惟焯嘗奏請潼關以西鳳翔以東河壩地曰皇祖所
賜先臣棧也戶部尙書梁材執奏陝西外供三鎮內給四

王困已極豈得復奪壩地濫給宗藩詔如材言

秦王傳

鄭靖王四世孫恭王厚烷世宗幸承天厚烷迎謁於新鄉
加祿三百石世宗脩齋醮諸王爭遣使進香厚烷獨不遣

二十七年七月上書請帝脩德講學進居敬窮理克己存誠四箴演連珠十章以神仙土木爲規諫語切直帝怒下其使者於獄已而故盟津王見潞子祐檣訐厚烜謀不軌遣官往訊無左驗帝下詔數厚烜驕慢無禮廢爲庶人幽之鳳陽隆慶元年復王爵增祿四百石世子載堉篤學有至性痛父非罪見繫築土室宮門外席褻獨處者十九年厚烜還邸始入宮萬厯十九年厚烜薨載堉言鄭宗之序盟津爲長前王見潞旣錫諡復爵矣爵宜歸盟津屢疏懇辭禮臣言載堉雖深執讓節然嗣鄭王已三世無中更理宜以載堉子翊錫嗣載堉執奏如初乃以祐檣之孫載璽

嗣二十三年上厯算歲差之法及所著樂律書考辨詳確
識者稱之

鄭王傳

四十一年御史林潤言天下財賦歲供京師米四百萬石
而各藩祿歲至八百五十三萬石山西河南存留米二百
三十六萬三千石而宗室祿米五百四萬石卽無災傷蠲
免歲輸亦不足供祿米之半年復一年愈加蕃衍勢窮弊
極將何以支事下諸王議明年南陵王睦模條上七議請
立宗學以崇德教設科選以勵人才嚴保勘以杜冒濫革
尤職以除素餐戒奔競以息饕貪制拜埽以廣孝思立憂
制以省祿費後頒宗藩條例多採睦模議云

周王傳

四十三年肅懷王紳堵薨無子靖王孫輔國將軍縉燾以
屬近宜嗣禮官言縉燾懷王從父不宜襲詔以本職理府
事上册寶罷諸官屬穆宗卽位定王妃吳氏及延長王眞
澆等先後上言聖祖刈羣雄定天下報功之典有隆無替
臣祖莊王受封邊境操練征戍屏衛天家不幸太宗中絕
反拘於昭穆之次不及勲武繼絕之典非所以崇本支厚
藩衛也下部議議以郡王理藩政帝不許隆慶五年特命
縉燾嗣肅王設官屬之半

肅王傳

隆慶二年尙書王世貞奏臣於嘉靖二十九年遇故修玉
牒臣云自親王而下至庶人已書名者幾三萬位又二十

年可得五萬位周府已近四千位韓府亦近千餘位雖竭天下之財力恐不足以供其源源之產臣竊以爲國家待宗室之意往往傷於用恩其法又傷於用義夫族屬至於奉國將軍亦可已矣又復推而三其中尉以至世世不絕所謂傷於用恩者也雖其疎者皆高帝及列聖後也無罪而困之於一城而絕其仕進之路所謂傷於用義者也乞下禮部會議於奉國將軍諸子免其祿秩分居附近州縣廢著之日給與房價量復徭役終身使得畢力農賈其有志科目者照常肄學應試聽爲南京及司府州縣等官疏

入不納

明臣奏議

三年五月禮部郎中戚元佐疏諸藩日盛祿糧不繼不及
今密爲區處將來更有難處者昔高皇帝眾建諸王皆擁
重兵據要地以爲國家屏翰此一時也靖難以後防範滋
密兵權盡解朝堂無懿親之跡府僚無轉補之階此又一
時也嗣是人多祿寡支用不敷乃有共蓬而居分餅而食
年四十而未婚沒數載而不寔强者劫奪於通衢弱者浸
入於輿阜此又一時也夫國初親王郡王將軍纔四十九
位女纔九位今二百餘年宗支玉牒見存二萬八千有奇
視國初不啻千倍卽盡歲供之輸猶不能給其半十年之
後又將何以給之議者謂祖制不敢擅更不知國初親王

之祿以五萬計其他緞匹茶鹽各項亦復相等不數年而止給米又不數年而減爲萬石萬石不能給而於代肅遼慶諸王且歲給五百石是高皇帝令自己出而已減於前矣其在今日事勢愈難可不變而通乎

明通紀

萬厯十年議准親王薨逝其子應襲者及世孫承重者俟服制滿方許請封若薨而絕嗣許親弟親姪進封爲親王如無親弟姪以次推及倫序相當者進封

王圻續通考

鎮國中尉睦楔覃精經學論者以方漢之劉向萬厯五年舉文行卓異爲周藩宗正領宗學約宗生以三六九日午前講易詩書午後講春秋禮記雖盛寒暑不輟

周王傳

十八年六月更定宗藩事例始令無爵者得自便

本紀

二十一年先是景王封德安土田倍諸藩國絕賦額猶存
及帝弟潞王之國衛輝悉以景賦予王王奏賦不及額帝
爲奪監司以下俸責撫按急奏報巡撫湖廣郭維賢言景
府賦額皆奸民投獻妄張其數臣爲王履畝增賦二萬五
千非復如往者虛數王反稱不足何也且潞去楚遠莫若
徵之有司轉輸潞府會典皇莊及勦戚官莊遇災蠲減視
民田今襄漢水溢王佃民流亡過半請蠲如例

郭維賢傳

二十三年正月鄭世子載堉請宗室皆得儒服就試毋論
中外職視才器使從之許奉國中尉以下入試輔國中尉

以上爵尊不得與其後禮臣李廷機言封爵科目原自兩途彼既願從科目入試應照士子出身資格銓除何拘原爵亦從之惟不得除京朝官

編二

趙翼曰崇禎中中部知縣名新堞者守城死流賊之難雲南通判壽鏐孫可望兵至欲降之不從遂遇害鞏昌通判廷璋署秦州城陷爲賊所執使之跪叱曰我天朝宗姓也今日惟求一死遂殺之

諸王傳

寶豐知縣朱由械

密縣知縣朱敏汀亦皆以宗貢生出仕死流賊之難

武大

烈此皆萬厯以後許宗人應試得官者也向使早如唐制宗人各有進身之路則平時既無坐食廩祿之費一

旦有事或亦有如吳王號王之爲國立功未嘗不可收
維藩之助乃直至末造始開入仕之途而已無及矣

明初親王歲祿外量給草廠牧地間有以廢壤河灘請者
多不及千頃部臣得執奏不盡從也景王就藩時賜予概
裁省楚地曠多閒田詔悉予之景藩除潞王翊鏐得景故
籍地多至四萬頃部臣無以難至福王常洵之國版籍更
定民力益絀尺寸皆奪之民間海內騷然論者推原事始
頗以翊鏐爲口實云

潞王傳

先是有旨言福王常洵之國非莊田足四萬不行廷臣大
駭葉向高因言會典載親王祿米萬石養贍名目已是添

設豈可過多各直省田土之數惟大郡方有四萬頃少者止一二萬頃自祖宗以來封國不少使各割一大郡則天下地已盡今日非但百姓無田卽朝廷亦無田矣況聖子神孫源源未已乎列聖相傳遵守家法豈無愛子欲加厚以祖制不敢踰越必如是而後萬世可常行耳福王所陳不過引景府潞府事例夫潞府就封時廢府田地尙多未嘗括及民間今田地已盡而租銀之入已過潞府何更求多乎至景府久不之國皇考在裕邸嘗懷危疑其後皇祖斷然遣之人心始安景府屢請楚地幾至激變當時皆譏皇祖過寵非以愛之亦前事之鑑也臣愚謂祖制當遵吉

典當舉王方建維城之固與國同休不當以土田小事滋天下之口又言使福王莊田必足四萬頃則之國無日王疏以祖制爲言試思親王四萬頃之莊田祖訓會典累朝功令有之乎臣不知王所引祖制何指也自景府以前無出數千頃外者惟景府以寵愛越分致壞祖制王奈何尤而效之乎況今河南山東撫按官揆括已盡恐有奸徒以投獻爲名者挾仇報怨中州齊楚間稍有土地者不安其生天下由此多事矣

三編

常洵請淮鹽千三百引設店洛陽與民市中州舊食河東鹽以改食淮鹽故非王肆所出不得鬻河東引過不行邊

餉由此絀戶科給事中姚宗文言方今鹽法壅滯鹽課不登今王府公行貨賣則狐鼠羣奸必至公然夾帶兩淮正額引鹽必滯河東行鹽之地自有成法一旦阻絕則行鹽地少鹽課必虧河南境內民肆向有堆賣官鹽價值一定若王府售賣昂值專利勢必騰湧民何以堪

三編

三十一年秦王以嫡子久未生請封其庶長子爲世子復請封其他子爲郡王禮部尙書郭正域皆持不可首輔沈一貫使大璫以上命脅之正域榜於門曰秦王以中尉進封庶子當仍中尉不當爲郡王妃年未五十庶子亦不得爲世子一貫無以難

郭正域傳

四十三年五月山西巡撫吳士度言國家建藩頒爵自親王郡王至將軍中尉俱有定祿年來宗支蕃衍間有無祿極貧或以擅婚私濫妾之子不敢請名者或以幼而無父不能請名者或已請名而家貧不能封者與孀婦身無所依者每名月給米一石折銀一錢於各府正項糧餉內支給從之

實錄

天啟五年五月行宗室限祿法

本紀

宗藩婚嫁命名例請於朝貧者爲部所稽自萬厯末至崇禎初積疏累千有白首不能完家室骨朽而尙未命名者禮部尙書何如寵請貧宗得嫁娶者六百餘人

何如寵傳

崇禎中戶部尙書倪元璐奏曰天下諸藩孰與秦晉秦晉
山險用武國也請諭二王以勦賊保秦責秦王以遏賊不
入責晉王王能殺賊假王以大將軍權不能殺賊悉輸王
所有餉軍賊平益封王各一子如親王亦足以明報矣二
王獨不鑒十一宗之禍乎王忠而熟於計必知所處矣書

上不報

馮師孔傳

十四年冬李自成攻開封周王恭枏出庫金五十萬餉守
陣者懸賞格殪一賊予五十金賊穴城守者投以火賊被
熱死者不可勝計乃解圍去

周王傳

明會要卷四終

明會要卷五

永新龍文彬纂

帝系五

公主

明制皇姑曰大長公主皇姊妹曰長公主皇女曰公主俱授金冊祿二千石壻曰駙馬都尉親王女曰郡主郡王女曰縣主孫女曰郡君曾孫女曰縣君元孫女曰鄉君壻皆儀賓郡主祿八百石餘遞減有差

公主傳

仁祖二女

太原長公主

嫁王七一洪武元年追冊

曹國長公主

嫁李貞洪武元年追冊爲

孝親公主三年改冊隴西長公主
公主五年改冊曹國長公主

太祖十六女

臨安公主

下嫁李祺

甯國公主

下嫁梅殷

崇甯公主

下嫁牛城

安慶公主

下嫁陽倫

汝甯公主

下嫁陸賈

懷慶公主

下嫁王甯

大名公主

下嫁李堅

福清公主

下嫁張麟

壽春公主

下嫁傅忠

十公主

早薨

南康公主

下嫁胡觀

永嘉公主

下嫁郭鎮

十三

公主

早薨

含山公主

下嫁尹清

汝陽公主

下嫁謝達

寶慶公

主

下嫁趙輝

南昌王女

附

福成公主

嫁王克恭

蒙城王女

附

慶陽公主

嫁黃琛建文時改慶成郡主

興宗四女

江都公主

下嫁耿濬初稱江都郡主建文元年進公主永樂初復降郡主

宜倫郡主

下嫁干禮

三女無考

南平郡主

未下嫁永樂十年薨追冊

成祖五女

永安公主

下嫁袁容

永平公主

下嫁李讓

安成公

主

下嫁宋琥

咸甯公主

下嫁宋瑛

常甯公主

下嫁沐昕

仁宗七女

嘉興公主

下嫁井源

慶都公主

下嫁焦敬

清河公

主

下嫁李銘

眞定公主

下嫁王誼

德安公主延平公主德慶

公主

俱早薨

宣宗二女

順德公主

下嫁石璟

常德公主

下嫁薛桓

英宗八女

重慶公主

下嫁周景

嘉善公主

下嫁王增

涇安公

主

下嫁蔡震

崇德公主

下嫁楊偉

廣德公主

下嫁樊凱

宜興公

主下嫁馬誠

隆慶公主下嫁游泰

嘉祥公主下嫁黃鏞

景帝一女

固安公主英宗復辟降稱郡主憲宗五年下嫁王憲禮儀視公主

憲宗五女

仁和公主下嫁齊世美 永康公主下嫁崔元 德清公主下嫁林岳

長泰公主仙遊公主皆早薨追册

孝宗三女

太康公主早薨 永福公主下嫁郭景和 永淳公主下嫁謝詔

世宗五女

常安公主思柔公主俱早薨追册 甯安公主下嫁李和 歸善

公主

早薨
追册

嘉善公主

下嫁許
從誠

穆宗六女

蓬萊公主太和公主

俱早薨

壽陽公主

下嫁侯
拱辰

永甯

公主

下嫁梁
邦瑞

瑞安公主

下嫁
萬煒

延慶公主

下嫁
王昺

神宗十女

榮昌公主

下嫁楊
春元

壽甯公主

下嫁冉
興讓

靜樂雲和雲

夢靈邱仙居泰順香山天台八公主

俱早薨
追册

光宗九女

懷淑公主

早薨

甯德公主

下嫁劉
有福

遂平公主

下嫁齊
贊元

樂安公主

下嫁鞏
永固

餘五女

皆早
世

熹宗二女

皆早薨

莊烈帝六女

坤儀公主

追諡

長平公主

周顯尙之

昭仁公主

城陷死

餘

三女

皆早世無考

雜錄

洪武元年冊南昌蒙城兩王女爲公主授王克恭黃琛爲駙馬都尉四年三月禮官上言皇姪女宜改封郡主克恭琛當上駙馬都尉詔帝曰朕惟姪女二人不忍遽加降奪其稱公主駙馬如故

公主傳

洪武元年以臨安公主歸李善長子祺拜駙馬都尉始命

禮官定公主下嫁之儀先期告奉先殿下嫁前二日遣使册公主册後次日謁奉先殿又定駙馬受誥儀吏部奉誥命置龍亭至太師府駙馬朝服拜受次日善長及駙馬謝恩後十日始請婚期

續通典

十九年壽春公主下嫁傅忠穎國公友德子也先是九年二月定制公主未受封者歲給紵絲紗絹布線已封賜莊田一頃歲徵租一千五百石鈔三千貫主爲太祖所愛賜吳江縣田一百二十餘頃皆上腴歲入八千石踰他主數倍

公主傳

二十六年稍更儀注然拜舅姑及公主駙馬相向拜之禮

終明世未嘗行也

通典

慶陽公主至建文時改封慶成郡主四年五月遣主詣燕軍議割地罷兵棣不奉詔主蓋成祖從姊或謂福成慶陽皆太祖從姊者誤也

公主傳三編

成祖卽位駙馬都尉梅殷尙擁兵淮上帝迫甯國公主齧血爲書投殷殷得書慟哭乃還京未幾都督僉事譚深錦衣衛指揮趙曦擠殷死橋下以殷自投水聞主牽帝衣大哭問駙馬安在帝曰爲主跡賊無自苦初主聞成祖起兵貽書責以大義不答成祖至淮北貽主書命遷居太平門外主亦不答然成祖故重主卽位後歲時賜與無算諸主

莫敢望

公主傳

公主薨逝例無諡號惟洪武元年追諡隴西公主爲孝親公主仁宗追封第四女爲德安公主諡曰悼簡世宗朝郭勛請追諡高祖母永嘉大長公主特賜諡曰貞懿

寶慶公主者高帝幼女也文皇既定京師俾仁孝皇后女之年十九歸駙馬都尉趙輝資粧比諸公主特厚時仁廟在東宮令送之至邸亦殊典也

已上春明夢餘錄

仁宗卽位進汝陽甯國懷慶大名南康永嘉含山寶慶七主皆進稱大長公主自後諸帝卽位公主進封長公主大長公主皆如制

公主傳

洪熙元年封皇女六人爲公主命先爲嘉興延平慶都三主府造中使司印中使司有正有副閹宦領之如王府之

承奉

野獲編

天順五年重慶公主下嫁周景主事舅姑甚孝衣履多手製歲時拜謁如家人禮景每早朝主必親起視飲食主之

賢近世未有也

公主傳

故事儀賓尙主無得繫牙牌惟成化六年禮部爲廊府儀賓王憲乞給牙牌上從之憲蓋尙景帝固安公主也

野獲編

宏治二年冊封仁和長公主重定婚儀入府公主駙馬同拜天地行八拜禮堂內設公主座於東西向駙馬東向座

餘如前儀

禮志

宏治四年固安公主卒上命喪禮一視嘉祥長公主嘉祥爲英宗女時固安母汪氏尙稱邸王妃其女乃得異數如此因思懿文太子三女長爲江都公主下嫁駙馬耿璿文皇降爲郡主儀賓竟以罪死

野獲編

英宗第二女嘉善公主下嫁王驥孫王增世宗第四女下嫁許崇誠亦封嘉善公主

同上

嘉靖元年永福長公主下嫁擇昏於七月下旬給事中安磐言公主於孝惠皇太后爲在室孫女期服未滿宜更其期舊儀駙馬見公主行兩拜禮公主坐受乖夫婦之分亦

當革正帝以遺旨格之相見禮如故

安磐傳

十二年永嘉大長公主元孫郭勅武定侯勛弟也援累朝公主例請廕入監禮臣言公主子孫本無入監事例因汝陽大長公主庶孫謝琰乞恩允之究非令典得旨不許萬厯壬寅以冊立皇太子恩詔內許公主廕子送監讀書

野獲編

萬厯三十六年七公主下嫁宣索至數十萬戶部尙書趙世卿引事力爭詔減三之一世卿復言陛下大婚止七萬長公主下嫁止十二萬乞陛下再裁損一倣長公主例帝不得已從之

世卿傳

崇禎元年教習駙馬陳鍾盛言臣教習駙馬鞏永固駙馬
黎明於府門外月臺四拜云至三月後則上堂上門上影
壁行禮如前始視膳於公主前公主飲食於上駙馬侍立
於旁過此方議成婚駙馬饋菓肴稱臣公主答禮書賜皆
大失禮夫旣合卺則儼然夫婦安有跪拜數月稱臣視膳
然後成婚者會典載行四拜於合卺之前明合卺後無拜
禮也以天子館甥下同隸役豈所以尊朝廷帝是其言令
永固卽擇日成婚

禮志

長平公主年十六莊烈帝選周顯尙主將婚以寇警暫停
城陷帝入壽甯宮主率帝衣哭帝曰汝何故生我家以劍

揮斫之斷左臂又斫昭仁公主於昭仁殿越五日長平公主復甦

大清順治二年命顯復尙故主土田邸第金錢車馬錫予有加主涕泣踰年病卒

公主傳

明會要卷五終

明會要卷六

永新龍文彬纂

禮一禮

禮

太祖初定天下首開禮樂二局廣徵耆儒分曹究討洪武元年命中書省暨翰林院太常寺定擬祀典乃厯敘沿革之由酌定郊廟宗社議以進禮官及諸儒臣又編集郊廟山川等儀及古帝王祭祀感格可垂鑑戒者名曰存心錄二年詔諸儒臣脩禮書明年告成賜名大明集禮其書準五禮而益以冠服車輅儀仗鹵簿宗學音樂凡升降儀節

制度名數纖細畢具又屢敕議禮臣李善長傅瓛宋濂詹
同陶安劉基魏觀崔亮牛諒陶凱朱升樂韶鳳李原名等
編輯成集且詔郡縣舉高潔博雅之士徐一夔梁寅周子
諒胡行簡劉宗弼董彝蔡深滕公琰至京同脩禮書若夫
釐正祀典凡天皇太乙六天五帝之類皆爲革除而諸神
封號悉改從本稱一洗矯誣陋習其度越漢唐遠矣禮志
洪武六年三月甲辰禮官上所定禮儀帝謂尙書牛諒曰
元世廢棄禮教因循百年中國之禮變易幾盡朕卽位以
來夙夜不忘思有以振舉之以洗汙染之習常命爾禮部
定著禮儀今雖已成宜更與諸儒參詳考議斟酌先王之

典務合人情永爲定式

大訓記

二十四年六月己未詔廷臣參考歷代禮制更定冠服居

室器用制度

本紀

明初之議禮也宋濂方家居諸儀率多陶安裁定大祀禮專用安議其餘參彙諸說從其所長祫禘用簷同時享用朱升釋奠耕藉用錢用壬五祀用崔亮朝會用劉基祝祭用魏觀軍禮用陶凱皆能援據經義酌古準今郁然成一代休明之治雖折中斷制裁自上心諸臣之功亦曷可少

哉

陶安諸臣贊

李善長傳已帥禮官定郊社宗廟禮尋奏定六部官制

議官民喪服及朝賀東宮儀奉命監脩元史編祖訓錄
大明集禮諸書定天下岳瀆神祇封號

宋濂傳濂於書無所不通在朝郊社宗廟山川百神之
典朝會宴享律厯衣冠之制四裔貢賦賞勞之儀旁及
元勲巨卿碑記刻石之辭咸以委濂

范常傳洪武元年擢翰林直學士兼太常卿帝銳意稽
古禮文羣臣集議間有異同常能參合眾言委曲當上
意

梁寅傳時以禮律制度分爲三局寅在禮局中討論精
審諸儒皆推服

陶安傳吳元年初置翰林院首召安爲學士時徵諸儒議禮命安爲總裁官

錢用壬傳初官御史臺經歷尋與陶安等博議郊廟社稷諸儀其議釋奠藉田皆援據經文及漢魏以來故事以定其制洪武元年拜禮部尙書凡禮儀祭祀宴享貢舉諸政皆專屬禮官又詔與儒臣議定乘輿以下冠服諸式時儒生多習古義而用壬考證尤詳確

詹同傳初遷考功郎中直起居注會議禘祫禮同議當遂用之

朱升傳洪武元年進翰林學士定宗廟時享齋戒之禮

崔亮傳初亮居禮曹時卽位大祀諸禮皆其所條畫丞相善長上之朝由是知名及爲尙書一切禮制用壬先所議行者亮皆援引故實以定其議考證詳確逾於用壬又請大祀前七日陪祀官詣中書受誓戒戒辭如唐禮又依周禮定五祀及四時薦新裸禮圭瓚鬱鬯之禮並言旗纛月朔望致祭煩而瀆宜止行於當祭之日皆允行之帝以日中有黑子疑祭天不順所致欲增郊壇從祀之神亮執奏漢唐煩瀆不宜取法乃止

牛諒傳諒三遷至禮部尙書更定釋奠及大祀分獻禮與詹同等議省牲冠服又奏三皇立廟京師春秋時祭

漢唐以下就陵立廟帝爲更定行之

劉仲質傳洪武十五年拜禮部尙書命與儒臣定釋奠禮頒行天下學校

陶凱傳洪武三年與崔亮並爲禮部尙書各有敷奏軍禮及品官墳塋之制凱議也

任昂傳十五年爲禮部尙書請更定冕服之制及朝參坐次又奏毀天下淫祠正祀典稱號

李原名傳爲禮部尙書以帝命行養老之政申明府州縣多寡之數定官民巾服之制皆著爲令凡郊社宗廟社稷嶽瀆諸制先後儒臣論定時有詳略帝悉令原名

更正之

劉三吾傳時天下初定典章闕略帝銳意制作宿儒凋謝得三吾晚說之一切禮制及三場取士法多所刊定

建文三年閏三月禮制成頒詔天下

明紀

永樂中頒文公家禮於天下又定巡狩監國及經筵日講之制

世宗以制禮作樂自任其更定之大者如分祀天地復朝日夕月於東西郊罷二祖並配以及祈穀大雩享先蠶祭聖師易至聖先師號皆能折衷於古獨其排眾議祔睿宗大廟躋武宗上徇本生而違大義以明察始而以豐昵終

矣

已上
禮志

嘉靖四年十二月大禮集議成頒示天下

七年六月明倫大典成頒示天下

已上
本紀

祭祀總敘

明初以圜丘方澤宗廟社稷朝日夕月先農爲大祀太歲
星辰風雲雷雨嶽鎮海瀆山川厯代帝王先師旗纛司中
司命司民司祿壽星爲中祀諸神爲小祀後改先農朝日
夕月爲中祀

天地太廟社稷山川諸神皆天子親祀國有大事則遣官
祭告若先農城隍旗纛馬祖五祀京倉先賢功臣合祀皆

遣官致祭而帝王陵寢及孔子廟則傳制特遣王圻續通考

正月三祭 上辛祈穀 立春享太廟 祭司戶

二月九祭 驚蟄祭太歲月將風雲雷雨諸神 春分朝

日於東郊 上戊祭太社太稷 上戊之明日祭帝社

帝稷 上丁祭先師孔子 上甲祭三皇 祭歷代帝

王廟 祭先農 祭司馬之神

三月三祭 清明祭奉先殿祭嶽鎮海瀆之神 祭泰厲

四月三祭 孟夏享太廟 大雩 祭司竈

五月二祭 夏至祀皇地祇於方丘前期祭告太廟

六月一祭 季夏祭中霤

七月二祭 孟秋享太廟 祭司門

八月十祭 秋分夕月於西郊 上戊祭太社太稷 上

戊之明日祭帝社帝稷 上丁祭先師孔子 上甲祭

三皇 祭歷代帝王廟 祭城南旗纛廟 祭都城隍

之神 祭天神地祇於山川壇 祭太歲月將風雲雷

雨之神 望日祀靈神

九月三祭 季秋大饗 霜降祭嶽鎮海瀆之神 祭旗

纛於教場

十月三祭 孟冬享太廟 朔日祭泰厲 祭司井

十一月二祭 冬至祀昊天上帝於圜丘前期祭告太廟

十二月三祭 季冬享太廟 歲暮大飴 祭旗纛於承

天門外

省牲

牲四等曰犢曰牛曰大牢曰少牢色尙騂或黝大祀入滌

九旬中祀三旬小祀一旬

吾學編

滌牲立神牲所設官二人牧養神牲祀前三月付廩犧令
滌治如法其中祀滌三十日小祀滌十日者亦如之

明集禮

洪武二年帝以祭祀省牲於神壇甚邇人心未安尙書崔

亮乃奏考古省牲之儀遠神壇二百步

崔亮傳

三年帝以郊祭之牲與羣祀牲同牢芻牧不足以別祀天

之敬乃因其舊地改作而加繪飾中三間以養郊祀牲左
三閒養后土牲右三閒養太廟社稷牲餘屋養山川百神
之牲凡大祀犧牲前一月帝躬視滌養繼命羣臣更日往
視歲以爲常

實錄

崔亮言大祀帝親省牲中祀小祀之牲當遣官代帝命親
祭者皆親省牲

崔亮傳

六年御史臺言吏部尙書呂本奉職不謹郊壇牲角非蘭
栗功臣廟壞不修詔免官罰役功臣廟

明會典

七年定制大祀皇帝躬省牲中祀小祀遣官

禮志

十三年九月溧水縣祭社稷以牛醢代鹿醢禮部言定制

祭物缺者以他物代帝曰所謂缺者以非土地所產溲水
固有鹿是有司故爲苟簡也百司所以能理其職而盡民
事者以其常存敬懼之心耳神猶忽之於人事又何懼焉
命論如律上同

凡郊廟犧牲已在滌者或有傷則出之死則埋之其有疾
者亦養於別所待其肥腯以備小祀中祀之用若未及滌
或有傷疾者歸所司別用春明夢餘錄

景泰四年令禮部鑄造牲字牢字火印各一會同太常寺
及御史印記各處解到牛羊同上

正德十五年三月戊戌清明節太常寺奏陵寢祭牲已有

定制豕爲必用之物請弛其禁從之

實錄

嘉靖十一年更定冬夏至祈穀俱祭前五日親視後俱遣

大臣圜丘蒼犢方丘黃犢配位各純犢

禮志

隆慶元年五月太常寺卿鄒應龍省牲北郊東廠太監馮保傳呼至導者引入正面焚香儼若天子應龍大駭劾保

僭肆保深銜之

鄒應龍傳

萬厯四十四年八月南京太常寺少卿桂有根言孝陵元旦清明長至三大祭文物俱備中元孟冬兩忌辰及萬壽節五祭向止陳設酒果應加用牲帛祭文從之

實錄

齋戒

洪武元年翰林學士朱升等奉敕撰齋戒文大祀七日前
四日戒後三日齋上曰凡祭祀天地社稷宗廟山川等神
爲天下祈福宜下令百官齋戒若自有所禱不關民事者
不下令又以致齋七日五日爲期太久人心易怠止臨祭
齋戒三日務致精專

通典

又詔大祀前七日陪祀官詣中書省受誓戒各揚其職不
共者國有常刑從禮部尙書崔亮請也

同上

三年諭禮部尙書陶凱曰人心操舍無常必有所警而後
無所放乃命禮部鑄銅人一高尺有五寸手執牙笏大祀
則書致齋三日中祀則書致齋二日於簡上太常司進置

齋所

禮志

陶凱又奏凡親祀皇太子宫中居守親王戎服侍從皇太子親王雖不陪祀一體齋戒

通典

五月建齋宮於圓丘之西方丘之東

實錄

四年禮官奏定天子親祀齋五日遣官代祀齋三日降香齋一日

二十一年定制齋戒前二日太常寺司官宿於本司次日

奏請致齋又次日進銅人傳制諭文武百官齋戒

已上禮志

宣德七年大祀南郊帝御齋宮命內官內使飲酒食葷入壇唾地者罪之司禮監縱容者同罪齋之日御史檢視各

官於齋次

會典

嘉靖九年定前期三日帝御奉天殿百官朝服聽誓戒

禮志

世宗以舊存齋宮在園丘北是踞視園丘也欲改建於丘之東南夏言言更起齋宮於園丘之旁似於古人掃地之義未爲允協且秦漢以來並無營室者正謂質誠尊天不自崇樹以明謙恭肅敬之旨故惟大次之設爲合古典願寢其議報聞

春明夢餘錄

明會要卷六終

明會要卷七

永新龍文彬纂

禮二 吉禮

親郊

太祖祀上帝於圓丘九

洪武元年十一月庚子二年十一月乙巳三年十月庚戌四年十一月辛酉五年十一月辛酉六年十一月辛酉七年十一月辛酉八年十一月辛酉九年十一月辛酉十年十一月辛酉

年十一月丙辰五年十一月辛酉六年十一月辛酉七年十一月辛酉八年十一月辛酉九年十一月辛酉十年十一月辛酉

合祀天地於奉天殿一

十年十一月丁亥

大祀天地於南郊二十

十二年正月己卯十三年正月己卯十四年正月乙未十五年正月乙未十六年正月乙未十七年正月乙未十八年正月乙未十九年正月乙未二十年正月乙未

丁未十八年正月辛未十九年正月乙未二十年正月乙未

年正月甲子	二十一年正月辛卯	二十二年正月丁亥	二十三年正月己卯	二十四年正月癸卯	二十五年正月乙未	二十六年正月辛酉	二十七年正月乙卯	二十八年正月丁未	二十九年正月辛酉	三十年正月乙卯	三十一年正月丙寅	三十一年正月壬戌
-------	----------	----------	----------	----------	----------	----------	----------	----------	----------	---------	----------	----------

惠帝大祀天地於南郊二

建文元年正月庚辰
三年正月辛未

成祖大祀天地於南郊十七

建文四年七月壬午
元年正月辛卯
二年正月

乙卯	三年正月庚戌	四年正月丁未	五年正月
丁卯	六年正月辛酉	七年正月乙卯	九年正月
甲戌	十年正月丁酉	十一年正月辛卯	十五年
正月丁丑	十九年正月甲戌	二十年正月辛未	
二十一年正月乙未			
二十二年正月戊子			

皇太子攝祀天地於南郊一

八年正月己卯

仁宗大祀天地於南郊一

洪熙元年正月丙戌

宣宗大祀天地於南郊九月宣德元年正月丁未二年正月丁未三年正月甲午四年正月甲午

年正月己未、五年正月癸丑、六年正月丁丑、七年正月癸酉、八年正月丁酉、九年正月辛卯、十年正月辛酉、十一年正月己卯、十二年正月辛酉、十三年正月丁酉

英宗前紀大祀天地於南郊十年正統五年正月己未六年正月己未七年正月己未八年正月丁卯九年正月辛酉十年正月辛酉十一年正月己卯十二年正月辛酉十三年正月丁酉

甲戌八年正月丁卯、九年正月辛酉、十年正月辛酉、十一年正月己卯、十二年正月辛酉、十三年正月丁酉

丙戌十一年正月己卯、十二年正月辛酉、十三年正月丁酉

景帝大祀天地於南郊七月景泰元年正月丙戌二年正月丙戌三年正月丙午四年正月丙午

年正月辛未、五年正月甲子、六年正月戊午、七年正月壬午

英宗後紀大祀天地於南郊六年天順二年正月甲戌三年正月乙未四年正月乙未五年正月甲戌六年正月乙未

丁亥五年正月庚戌、六年正月丁未、七年正月丙午

憲宗大祀天地於南郊二十二年成化元年正月己未二年正月乙卯三年正月乙卯四年正月乙卯五年正月己未六年正月己未七年正月己未八年正月己未九年正月己未十年正月己未十一年正月己未十二年正月己未十三年正月己未十四年正月己未十五年正月己未十六年正月己未十七年正月己未十八年正月己未十九年正月己未二十年正月己未二十一年正月己未二十二年正月己未

己卯	四年正月甲戌	五年正月乙丑	六年正月
己丑	七年正月丙戌	八年正月庚戌	九年正月
丁未	十年正月丁酉	十一年正月癸亥	十二年
正月辛亥	十三年正月庚戌	十四年正月甲戌	
十五年正月丁卯	十六年正月甲午	十七年正月	
丙戌	十八年正月壬午	十九年正月丙午	
年正月庚寅	二十一年正月		
甲申	二十二年正月己未		

孝宗大祀天地於南郊十八
宏治元年正月丙午二年

四年正月己丑	五年正月壬午	六年正月甲子
七年正月丁酉	八年正月乙未	九年正月壬辰
十年正月庚戌	十一年正月丁未	十二年正月
辛未	十三年正月己丑	十四年正月己未
年正月丙戌	十六年改卜郊二月戊申	
十七年正月甲戌	十八年正月乙未	

武宗大祀天地於南郊十五
正德元年正月己丑二年

四年正月丙午	五年正月丁卯	六年正月甲子
七年正月己未	八年正月壬午	九年正月丁丑

十年正月戊辰 十一年正月乙未 十二年正月
己丑 十三年正月庚戌 十四年正月甲辰改卜郊
二月丁巳 十五年正月
癸巳改卜郊 十二月丁酉

世宗大祀天地於南郊九 嘉靖元年正月己未 二年正
月乙卯 三年正月丁丑 四年

年正月辛未 五年正月乙未 六年正月己丑 七
年正月丙戌 八年正月庚戌 九年正月丁酉

祀昊天上帝於南郊一月辛酉

祀天於南郊六 十年十一月甲寅 十一年十一月庚
申 十三年十一月庚午 十四年十

一月乙亥 十五年十一月辛巳 十七
年十一月辛卯 十八年十一月丙申

穆宗祀天於南郊四 隆慶元年十一月丁亥 二年十一
月戊辰 三年十一月甲戌 四年

十一月
己卯

神宗祀天於南郊三 萬曆三年十一月乙巳 六年十
一月辛酉 十四年十一月癸卯

熹宗祀天於南郊一

天啟三年十一月丁巳

莊烈帝祀天於南郊四

崇禎元年十一月癸未八年十一月辛巳

十三年十一月丁亥

親祀北郊

太祖祀地於方丘三

洪武二年五月癸卯三年五月戊申五年五月戊午

世宗祀皇地祇於方澤二

嘉靖十年五月壬子十四年五月癸酉

穆宗祀地於北郊一

隆慶元年五月辛酉

神宗祀地於北郊二

萬曆四年五月戊申七年五月癸亥

熹宗祀地於北郊一

天啟五年五月乙丑

莊烈帝祀地於北郊四

崇禎二年四月癸未十三年五月戊子十四年五月戊子

五年六月甲子皆本紀

吳元年八月癸丑園丘成本紀

十一月甲午太祖初觀園丘顧謂起居注熊鼎等曰此與古制合否對曰小異帝曰古人於郊埽地而祭器用陶匏以示儉樸周有明堂其禮始備今予創立斯壇雖不必盡合古制然一念事天之誠不敢頃刻少怠大訓記

十一月乙巳有事於園丘禮官請罷禮成詣太廟躬謝之儀唯先祭三日詣太廟以配享告從之帝欲增郊壇從祀之神崔亮奏漢唐煩瀆不宜取法乃止通典

洪武二年八月建望祭殿實錄帝慮郊社諸祭壇而不屋或

驟雨沾服亮引宋祥符九年南郊遇雨於大尉廳望祭及
元經世大典壇壝內外建屋避風雨故事奏之遂詔建殿
於壇南

帝一日問崔亮曰朕郊祀天地拜位正中而百官朝參班
列東西何也亮對曰天子祭天升自午陛北向答陽之義
也祭社升自子陛南向答陰之義也若羣臣朝參當避君
上之尊故升降皆由卯陛朝班分列東西以避馳道其義
不同

亮又言郊特牲曰器用陶匏周禮疏外祀用瓦今祭祀用
甕與古意合而盤盂之屬與古尙異宜皆易以甕惟籩用

竹從之

已上皆崔亮傳

三年增祀風雲雷雨於園丘天下山川之神於方丘

禮志

二月太常少卿陳昧言周禮天府孟冬祀司民司祿而獻民數穀數則受而藏之今園丘郊祀宜以戶口錢糧之籍陳於臺下禮畢藏之內府以見拜受民數穀數於天之義從之

實錄

六年正月選朝天宮道士供事郊壇

三編

御批輯覽曰郊壇理宜誠肅駿奔執事豈宜司以羽流當時議禮諸臣如劉基宋濂詹同輩俱博古而達於政體何不聞一言匡正耶至嘉靖時而齋醮事興益以崇尚

道教爲務此其濫觴矣

七年冬至詞臣撰南郊祝文用予我字帝以爲不敬桂彥

良曰成湯祭上帝曰予小子履武王祀文王之詩曰我將

我享古有此言帝色霽曰正字言是也

桂彥良傳

是年增設天下神祇於南北郊帝謂詹同曰大祀終獻畢

始行分獻禮未當同乃與學士宋濂議以上初獻奠玉帛

將畢分獻官卽行初獻禮亞獻三獻皆如之

禮志

八年十一月學士樂韶鳳等奏定大祀祭壇脫舄之儀謂

古者以履不上堂爲敬漢魏朝祭皆洗鞵惟蕭何劍履上

殿以爲異數宋南郊皇帝至南階脫舄升壇入廟脫舄升

殿所以崇敬也今議於郊祀廟享前期一日有司以席藉地設御幕於壇東南門外設執事官脫履之次於壇門外西階側祭日大駕入幕次脫舄始升壇殿行禮分獻陪祀官皆脫舄於外協律郎樂舞生皆洗韞上詔行之

實錄春明夢餘

九年定郊社大事國有三年喪不廢

吾學編

十年八月帝感齋居陰雨覽京房災異之說謂分祭天地情有未安欲舉合祀之典命卽園丘舊址爲壇以屋覆之命曰大祀殿十一月冬至以殿工未成乃合祀於奉天殿

續通典

文彬案太祖釐正祀典革除天皇太乙六天五帝之類去獄鎮海瀆城隍諸神封號改從本稱盡洗漢唐以來陋習又分祀天地舉千數百年相沿之誤一旦整飭洵足爲萬世法守未幾感齋居陰雨仍改天地合祀立大祀殿屋而不壇合圓丘明堂爲一制此失禮之尤者揆其意不過欲省煩而趨便耳彼時禮部長貳官如朱夢炎李冕輩庸闇不識大體未能抗疏力爭沿謬百六十年至嘉靖始復舊典然非夏言輩力排羣議亦未能贊成其美則甚矣復古之難也

十二年正月己卯始合祀天地於南郊

本紀

又建神樂觀於

郊壇之西以處樂舞生

實錄

永樂十八年京都大祀殿成規制如南京南京舊郊壇國
有大事則遣官告祭

禮志

洪熙元年正月丙戌南郊誓戒畢帝進分獻官諭之曰事
神之道豈獨臨事之際務致誠敬要其奉天子民之心積
累於平日者乎達鬼神所以祭則受福

大訓記

正德十年正月戊辰帝有事於南郊逮暮成禮給事中王
良佐言郊廟之祀天子必省牲必誓戒散齋致齋有常期
有專所當祭之日夙駕而往行禮之際無貳爾心期昭格
也邇者正月五日躬祀太廟薄暮方出行禮十日郊祀七

明倫彙編 家範典 卷一百一十五
日當誓戒臣等導駕與百官俱朝服候至夜漏下忽傳聞
免朝不知旨從何出九日車駕當臨齋宮百官莫不晨趨
以俟乃薄暮方往倉猝至壇行禮甫畢旋即下營臣愚不
知陛下此行果事天耶抑遊幸也及次日駕還復至夜分
城門失啟閉之期禁闔縱馳騁之樂一切非時與制乞自
今祭祀朝賀之期經筵講書之候起居寢興之節務各及
時遵制舉行不報

十二年正月戊寅召百官至左順門告以己丑郊竣將幸
南海子觀獵廷臣極諫不聽及期速戴祀事遂往畋

十三年正月丙午帝至自宣府庚戌當南郊以初至不及

致齋遂行禮

已上
三編

十四年正月甲辰改卜郊先是太常寺奏以是月十二日郊祀至是以聖駕未回請改卜內批改次日旣又命改卜於是禮科給事中邢寰等言祖宗以來郊祀必於正月上旬所以重一歲之首昭莫大之敬也今改而又改日復一日不惟隳祖宗相循之制亦且非祗畏天地之道請如期返蹕以成大禮禮部尙書毛澄等馳疏諫曰皇祖之訓曰凡祀天地精誠則感格怠慢則禍生今六龍遐騁旋軫無日萬一冰雪阻違道途梗塞元正上日不及躬執玉帛於上帝前陛下何以自安伏乞趣駕速還躬親禋享宗社臣

民幸甚俱不報壬戌欽天監奏擬郊祀日期傳旨令擇二月上旬以聞太常寺奏仲春當釋奠先師及祀社稷而郊禮未成請俟郊後擇丁戌日行禮報可

嘉靖十年九月丙辰罷南京郊祀初上命脩輯郊社諸壇未成南京太常寺卿黃芳等言天地社稷山川旣統祀於京師其在南京者可弗舉也若有時祭告及災變脩理等事因事行之亦非常祭之比宜祭告孝陵及山川諸神不必備物酒醴脯醢而已上以爲然遂罷之

已上實錄

十一年冬至尙書言前此有事南郊風寒莫備乃采禮書天子祀天張大次小次之說請作黃氍御幄爲小次每大

祭所司以隨值風雪則設於園丘下帝就幄中對越而升降奠獻以太常執事官代之命著爲令

禮志

十七年十一月辛未朔詣南郊上皇天上帝號

本紀

隆慶四年十一月己卯祀天於南郊舊制郊畢舉慶成宴自世宗倦勤典禮久廢至是禮部尙書殷士儋始考定舊儀行之

殷士儋傳

萬厯十三年禮科給事中王三餘疏言郊祀必躬親載之會典乃者秋七月雷震郊壇恭繹德音宣示臣工共圖脩省今歲似宜親郊以答天戒代攝之舉未可以爲常疏入帝以其奏請不早詰責之仍遣官代

三編

郊議

洪武元年二月壬寅朔中書省臣李善長等奉敕撰進郊祀議略言王者事天明事地察故冬至報天夏至報地所以順陰陽之義也祭天於南郊之圓丘祭地於北郊之方澤所以順陰陽之位也周禮大司樂冬至禮天神夏日至禮地祇此三代之正禮而釋經之正說自秦立四時以至禮地祇此三代之正禮而釋經之正說自秦立四時以祀白青黃赤四帝漢高祖復增北時兼祀黑帝至武帝有雍五時及渭陽五帝甘泉太乙之祠而昊天上帝之祭則未嘗舉行魏晉以後宗鄭元者以爲天有六名歲凡九祭宗王肅者以爲天體惟一安得有六一歲二祭安得有九

雖因革不同大抵多參二家之說自漢武用祠官寬舒議立后土祠於汾陰睢上禮如祀天而後世因於北郊之外仍祠后土鄭元又惑於緯書謂夏至於方丘之上祭崑崙之祇七月於泰折之壇祭神州之祇析而爲二後世又因之一歲二祭元始閒王莽奏罷甘泉泰畤復長安南北郊以正月上辛若丁天子親合祀天地於南郊由漢唐厯千餘年間皆因之其親祀北郊者惟魏文帝周武帝隋高祖唐元宗四帝而已宋元豐中議罷合祭紹聖政和閒或分或合高宗南渡以後惟用合祭之禮元成宗始合祭天地五方帝已而立南郊專祀天泰定中又合祭文宗至順以

後惟祀昊天上帝今當遵古制分祭天地於南北郊冬至祀昊天上帝於圜丘以大明夜明星辰太歲從祀夏至祀皇地祇於方丘以五嶽五鎮四瀆從祀太祖如其議行之建圜丘於鍾山之陽方丘於鍾山之陰

禮志

三編質實云按唐書睿宗太極元年夏五月祭北郊是月改元延和八月元宗卽位改元先天是親祭北郊者睿宗非元宗也此議偶誤耳

嘉靖九年帝旣定明倫大典益覃思制作凡郊廟百神咸欲斟酌古法釐正舊章乃問張璁曰書稱燔柴祭天又曰類於上帝孝經曰郊祀后稷以配天宗祀文王於明堂以

配上帝以形體主宰之異言也朱子謂祭之於壇謂之天祭之屋下謂之帝今大祀有殿是屋下之祭帝耳未見有祭天之禮也況上帝皇地祇合祭一處亦非專祭上帝摠言國初遵古禮分祭天地後又合祀說者謂大祀殿下壇上屋屋卽明堂壇卽圜丘列聖相承亦孔子從周之意上復諭摠曰二至分祀萬代不易之禮今大祀殿擬周明堂或近矣以爲卽圜丘實無謂也摠乃備述周禮及宋陳襄蘇軾劉安世程頤所議分合異同以對且言祖制已定無敢輕議帝銳欲定郊制卜之奉先殿太祖前不吉議且寢會夏言請舉親蠶禮帝以古者天子親耕南郊皇后親蠶

北郊適與所議郊祀相表裏因令璵會言陳議言乃上疏
言國家合祀天地及太祖太宗之並配諸壇之從祀舉行
不於長至而於孟春俱不應古典宜令羣臣博考詩書禮
經所載郊祀之文及漢宋諸儒匡衡劉安世朱熹等之定
論以及太祖國初分祀之舊制陛下稱制而裁定之此中
興大業也禮科給事中王汝梅等詆言說非是上切責之
乃敕禮部會廷臣各陳所見且言汝梅等舉召誥中郊用
二牛謂明言合祭天地夫用二牛者一帝一配位非天地
各一牛也又或謂天地合祀乃人子事父母之道擬之夫
婦同牢褻慢已甚又或謂郊爲祀天社稷爲祭地古無北

郊夫社乃祭五土之神猶言五方帝耳非皇地祇也社之名不同自天子以下皆得隨所在而祭之故禮有親地之說非謂祭社卽方澤祭地也於是下言疏令禮部一併議行三月丙申璵錄上郊祀考議一冊時詹事霍韜深非郊議且言分祀之說惟見周禮莽賊僞書不足引據於是言復上疏言周禮一書於祭祀爲詳大宗伯以祀天神則有禋祀實柴禋燎之禮以祀地祇則有血祭薶沈醢辜之禮大司樂冬至日地上圜丘之制則曰禮天神夏至日澤中方丘之制則曰禮地祇天地分祀從來久矣故宋儒葉時之言曰郊丘分合之說當以周禮爲定今議者旣以太社

爲祭地則南郊自不當祭皇地祇何又以分祭爲不可也
合祭之說實自莽始漢之前皆主分祭而漢之後亦間有
之宋元豐一議元祐再議紹聖三議皆主合祭而卒不可
移者以郊賚之費每傾府藏故省約安簡便耳未嘗以分
祭爲非禮也今之議者往往以太祖之制爲嫌爲懼然知
合祭乃太祖之定制爲不可改而不知分祭固太祖之初
制爲可復知大祀文乃太祖之明訓爲不可背而不知存
心錄固太祖之著典爲可遵且皆太祖之制也從其禮之
是者而已敬天法祖無二道也周禮一書朱子以爲周公
輔導成王垂法後世用意最深切何可誣以莽之僞爲耶

且合祭以后配地實自莽始莽旣僞爲是書何不削去圜丘方丘之制天神地祇之祭而自爲一說耶疏入下禮部令折衷羣議以聞辛丑禮部集上羣臣所議郊禮奏曰主分祭者都御史汪鉉等八十二人主分祭而以慎重成憲及時未可爲言者大學士張璁等八十四人主分祭而以山川壇爲方丘者尙書李瓚等二十六人主合祭而不以分祭爲非者尙書方獻夫等二百六人無可否者英國公張崙等一百九十八人臣等祇奉敕諭折衷衆論分祀之義合於古禮但壇壝一建工役浩繁禮屋祭曰帝夫旣稱昊天上帝則當屋祭宜仍於大祀殿專祀上帝改山川壇

爲地壇以專祀皇地祇旣無創建之勞行禮亦便上復諭
當遵皇祖舊制露祭於壇分南北郊以二至日行事言乃
奏曰南郊合祀循襲已久朱子所謂千五六百年無人整
理而陛下獨破千古之謬一旦舉行誠可謂建諸天地而
不悖者也已而命戶禮工三部偕言等詣南郊相擇禮臣
欲於具服殿稍南爲圓丘言復奏曰圓丘祀天宜卽高敞
以展對越之敬大祀殿享帝宜卽清闕以盡昭事之誠二
祭時義不同則壇殿相去亦宜有所區別乞於具服殿稍
南爲大祀殿而圓丘更移於前體勢峻極可與大祀殿等
制曰可於是作圓丘是年十月工成而分祀之制遂定

禮志

隆慶元年禮部會議罷祈穀及明堂大享禮圜丘方澤分祀已久宜照例於冬至夏至日親祭仍奉太祖高皇帝配禮部又言郊廟社稷諸祀先期具奏行禮止奏日不奏時以故陪祀諸臣失期者眾請以後並奏日時從之

通典

萬厯三年十一月大學士張居正進郊禮新舊圖冊略言高皇帝初制郊禮分祀十年矣而竟定於合享者良以古今異宜適時爲順故舉以歲首人之始也卜以春初時之和也歲惟一出事之節也爲屋而祭行之便也百六十餘年列聖相承莫之或易者豈非以其至當允協經久而可行乎今以冬至極寒而裸獻於星露之下夏至盛暑而駿

日知錄卷一
二
奔於炎歊之中一歲之間六飛再駕以時以義斯爲戾矣
且成祖文皇帝再造宇宙功同開創配享百餘年一朝而
罷之於人情亦大有不安者故世宗雖分建圓方之制而
中世以後竟不親行雖肇舉大享之禮而歲時禋祀止於
內殿是斯禮之在當時已窒礙而難行矣況後世乎臣等
愚昧竊以爲宜遵高皇之定制率循列聖之攸行歲惟一
舉合祀之禮而奉二祖並配斯於時義允協於人情爲順
顧郊禋禮重今且未敢輕議謹稽新舊規制禮儀而略述
其概以俟聖明從容裁斷焉上從之

王圻續
通考

通典注按居正進新舊禮圖欲改合祀然四年七年五

月俱嘗祀地北郊固未嘗改爲合祀故神宗熹宗莊烈
帝三紀皆書祀天特祭地之禮不行耳

文彬按江陵此議疎謬之甚特其時未嘗舉行耳神宗
自七年後郊祀不親惟十四年一祀天非特祀地之禮
不行也熹宗祀天一年三祀地一年五莊烈祀天四年元年八
年十祀地四二年十三年十皆見本紀通典注云三紀
皆書祀天特祭地之禮不行誤也

明會要卷七終